

晚晴移詩匯

晚晴移詩匯卷七十四目錄

蔡新 二首

金德瑛 九首

秦蕙田 四首

曹秀先 三首

張若潭 一首

曠敏本 三首

仲永檀 一首

趙青藜 二首

李師中 二首

朱嘉善 一首

湯聘 一首

王顯緒 二首

全祖望 十一首

黃永年 一首

鄭燮 十五首

王立性 一首

金門詔 一首

萬光泰 十六首

李海觀 二首

孫廷權 四首

曹復元 一首

祝淦 一首

于敏中 一首

周煌 八首

德保 五首

觀保 四首

王會汾 一首

林枝春 二首

任端書 六首

張若需 二首

喬光烈 四首

錢琦 九首

國梁 十二首

張九鎰 二首

帥家相 三首

彭遵泗 一首

沈雅 一首

史震林 二首

蘇鶴成 二首

翁文達 一首

孫擴圖 一首

晚晴移詩匯卷七十四

徐世昌

蔡新字次明號葛山漳浦人乾隆丙辰進士改庶吉士授編修官至東閣大學士加太子太師諡文恭有緝

齋詩文集

詩話文恭爲文勤猶子承闕學正傳朝端推爲鉅人長德直上書房四十餘年澄懷八友圖卽册自文恭遂爲旋圖故事詩亦雅健宏深有正笏垂紳之度

題汪文端公松泉圖

種樹添新蔭先當培其根疏泉資灌溉先當裕其源少師勤學殖呈材依禁垣汲深藉修綆下筆文瀾翻承明自獻納公望羣所尊御賜飛白書中有至道存松貞泉比潔寶之重瑱璠贊皇平泉記溫公獨樂園何如此清華天語含

春溫憶我追陪日直舍鄰高軒文漪頻挹注美植長滋繁
披圖感今昔遺韻猶堪論既以惠來學復此垂後昆始知
餘慶在世業皆君恩

題古中盤五松圖

昔聞畢宏畫偃畫古松振筆長風浩呼喚如何此卷僅矮
幅而多天矯騰踔之蟠龍鱗爪攫拏勢莫至濤聲在耳雲
盪胸倬哉萬松老居士筆端具有造化工此圖何處得畫
本傳自古云盤谷之中峯侍從宸游多燕暇相對勝友此
扶筇濡毫拂素標異狀貌得盤山古幹真形容最憐後彫
質沐日浴月幾春冬太平之世豈獨民仁壽草木亦含雨
露濃君不見泰山上有五大夫風煙剝落摧秦封如此蒼
髯礪硯突兀自千古得非福地神秀鍾松兮松兮安得布

襪青鞋盤桓於爾側髣髴乎桂父木客之高蹤

金德瑛字汝白一字慕齋號檜門仁和人乾隆丙辰舉博學鴻詞一甲一名進士授修撰官至都察院左都

御史有檜門詩存

詩話檜門遭際承平和聲鳴盛廊廟賡歌之什流傳極多而性樂佳山水通籍二十七年持節衡文東歷泰山南逾江淮窮三山五嶺之奇每登臨題詠人爭傳誦其游錦屏山與蔣心餘詩云故知凌空發意趣氣味凡境皆瓌奇蓋自道得江山之助也

題吾汶稟

丞相不勸原必死先書祭文數十紙待得燕山齒髮歸同心不媿同鄉里昔者宋玉師屈原莫能直諫空招魂未知楚滅身何所千古但有風流存何如廬陵王鼎翁恥作機雲作陳東心哀母老難許國不然隨殉柴市中虔州之水

洪州驛處處悲風寒凜慄義士相望四百年歙州亦有江
天一

康郎山功臣廟歌

紅羅真人起滁濠天弧墮地揚旌旄龍蟠虎踞定南國削
平僭亂如吹毛上游楚氛勢頗惡奮臂怒比螳螂騎江漢
竊據意未定騎鹿欲向南山遊南昌堅城鐵作甕撼山有
力空爲勞金陵援師來颯颯乘風颺謀臣猛將談六韜從
以仙人周顛左右舟中翱賊徒返旆出彭蠡扼吭不得通
江湖罪貫不盈勢不滅介恃戰艦匡廬高鯨鯢小捷遽得
意紀信出詐漢王跳遂令三十六將同戰死廟貌留祀康
山椒中山一人丁普郎齊雲振舵如魚舳韓成居左同列
坐半褰赴水赭黃袍其餘面驛面塗炭冒突烽焰頭毛焦

別有三五少年白面帶微笑甲冑踴躍輕波濤豈是鴟夷
生去日塑工肖得窮秋毫定應賊顛貫矢後英靈舞扑隱
約來林皋惜哉張定邊爾亦男兒曹天完逆將眼不擇猶
奉餘孽奔危巢奇材劍客誤荆楚百萬齊作跖犬嗥髑髏
鋪滿大湖底陰夜餒哭聲號咷甯知此廟三百年春秋伐
鼓牛羊牢古槐鬱鬱崇封袞曾護眞主驅鴟鴞枯株斷枿
猶敬惜過客競奠香牲醪廟前古槐一株相傳明祖避難
其下後錫封號迄今行舟啟禱
枯幹架置廟中不敢私燬嗚呼樹木尙如此英雄可不慎所遭湖波浩
淼風蕭騷廟中木主永勿祧金匱石室之史儻遺漏不妨
搜討姓氏鐫刻蟠龍螭

雪度井陘關與周石帆學士同用漁洋韻作歌

蓬萊宮出祭紙黃秦晉蜀使車聯行

予奉使祭女媧成湯
二陵石帆祭蜀江源

徐石溪太常祭關溝漚沱渡後望險阻漸覺山谷生蒼涼燕

趙古稱多節義齒冷隙末羞陳張唐藩幽鎮互割據晉陽

東面鎖鑰詳陰雲似凝古壁壘玉屑忽灑征衣裳羣仙跨

鶴羽節幢浮空遊戲樂未央與夫軒前又輕後滑汰側足

頻隄防舊關據隘向中路新關轟翠堆雷碾角聲縹緲出

雉堞飛白點點旌旗揚山農舊冬苦無雪今喜麥隴滋不

荒高低蠶坏露門竇一穴豈辨堂與皇石田春冷遲墾作

枯草逆罅如鍼秧嗟爾謀生太踟躕慙我傳食隨翱翔不

逢爭戰不耕戍但騁筆墨含風霜峯迴漸失韓信幟出坎

更弔興唐王

題沈叔園觀察勞山吟眺圖

法坤厚畫

大勞小勞肩隨高七真遷跡今未遙仙家闕恹不好事搜

奇洩異須吾曹芒鞋無緣徑路絕恰藉按部窮巖坳金剛
崩劣玉女睇鳳凰翔翥獅虎號崇巒窞穴明復晦倒根插
濯黏天濤隨車吮墨大弟子予吟汝繪爭爲豪蒼華櫛沐
近照耀醜神知覺潛沈逃惡風弱水屬荒誕歸帶煙霧衣
巾飄文人眼大山海渺收納卷軸銖釐毫從君覩縷細指
數舊嘍泰岱不如勞我雖足阻神已到讀詩見畫忘蕭騷

制硯歌贈陸蒲塘孝廉

書生硯田苦耕耘田之授受由他人蒲塘乃欲創物始月
斧自闢蒼雲根渾然元圭質素璞疆場凹凸逐手分平留
掌面蕉葉色細出鐘鼎雷回紋零星小石逞遊戲一滴混
漾珠含脣晴窗曉日光鮮新高吟騷雅追皇墳袖閒無聲
運斧斤淵淵古氣相氤氳鍾王韓杜未落紙隱約逗露先

天文囊中蓄得端溪品相戒不許俗手捫每愛青花浮荇
藻恰遇妙斲鐫琕琕餘工試與遣暇隙譬運重甃連朝昏
文章已出戒剽竊制器那用躬辛勤知君寓意弗苟且詩
筆掃盡窠臼陳硯成獨許享其逸此田屬我長子孫

徐州懷古

帥五諸侯共滅秦英雄開闢古無倫漢營氣早成天子垓
下頭終德故人落日霸都濰水壯東風姬血草痕新天亡
戰罪徒分別項伯功封異姓親

秋濤怒卷古彭城太守臨隄版築成猛士詩人樓九日羽
衣吹笛月三更曾吟大集淋漓句今聽雙洪斗落聲歎息
故山歸未得不勝風雨弟兄情

閉門寂寞陳無己文字南豐一瓣香不向蘇門作賓客況

從時相假衣裳士生貴富天常吝志在孤清死不妨安得
斯人式通俗洪河東下日湯湯

桃源

主人耕作客人漁說向先秦恂恍餘好是碧溪紅樹裏不
傳數卷未焚書

秦蕙田字樹峯無錫人乾隆丙辰一甲三名進士授編

修官至刑部尙書諡文恭有味經窩類藁

詩語文恭經術湛深所纂五禮通考蒼萃羣言折衷
今古坐言可以起行最爲有功經義當時詔舉經學
文恭之贊議居多詩亦
篤雅沖和醇而不腐

冬夜有懷和天鈞上人

暮雲歸遠樹夕陽在西嶺招提寂無人徙倚息孤影空山
響天籟嚴霜襲衣冷皓魄澹禪心涼宵知漏永嗟余履屯

難壯志邈難騁反側聽蛩吟熒熒一鐙靜清廳山中來助
我發深省起坐調鳴琴幽懷徒耿耿

答復初先生見寄之作

六籍聖人貽紹述賴百氏紀綱天地人厥功焉可紀精言
與大義歷歷瞭如指性功達治術出處均一軌胡爲後世
士觸目驚且哆如構九層臺版築傾基址又如舟失舵簸
蕩風波裏禮器及車服誰復求形似吾邑有顧翁復古氣
雄偉窮年抱遺經含咀吸真髓脫身塵壒外清曠莫與比
擁書萬卷樓尋原必迄委初年學古文下筆輒光煒尙論
愛司馬年譜究終始先生會著温公年譜神交若投契覲面相應唯
詎止傳賢蹤禔補先正史三禮圖宮室古意追釋米穿穴
暨春秋三傳列硯几創成大事表務合筆削旨書成忽十

稔作歌告諸子謂蒙守樸學謬與談名理款款尺素書殷
勤附赤鯉軒朗豁雙眸不啻脫疔痕所恨久離索末由竟
株柢先生名山業塵垢視青紫高風式鄉閭立志起頑鄙
嗟予日荒落勺蠡難測海持示蔡與吳入手先色喜何當
返柴荆百尺容攀倚

燕子磯

策杖陟層巔凌虛望遠天江山自終古亭榭幾經年帆影
懸殘照漁歌入暮煙長吟舒逸興風月任無邊

秋齋雜詠

夙有東臯約春畦十畝閒窗開泉上樹門對雨中山好鳥
亦知靜孤雲時就閑何當守寂寞長掩舊柴關

曹秀先字冰持號地山新建人乾隆丙辰進士改庶吉

士授編修官至禮部尙書諡文恪

玉芝

祕感敷神草幽元洞孝經仙人渺蹤迹芝閣闕儀形玉葉
雲心冷瓊盤雨意冥可堪四十載灼灼未凋零

陰雲

欲雨復不雨雲氣鬱寒陰颼颼遠風起飄散吹平林陽烏
斂飛燄高隱層霄岑韜光黜外視而無塵埃侵自然得所
養沐浴江海溥此時如水鏡罔象堪幽尋

雄縣舟中

繞城一水自彎環野色雲容各自閒便當乘槎溯天漢眼
中少箇是名山

張若潭字紫瀾號魚牀桐城人乾隆丙辰進士改庶吉

士授檢討

釋褐後紀恩

門開闔闔試璿宮兩度含毫紫禁中
捧出松煙金殿覆分來綬餅玉階紅
響傳鈴索風聲肅身到蓬萊日影籠宮錦
賜歸初釋褐一門三世拜恩同

曠敏本字响嘯衡山人乾隆丙辰進士改庶吉士有响嘯集

寄懷六兄文之

菰米滿江皋霜雁垂兩翼雁飛自成行
我獨苦岑寂君寓榔之南我來湖以北
譎陋不自揣使院理筆墨歛忽半載
餘深悲駒過隙劇思風雨夜對牀疑共析
男兒生世閒懽聚信難得高堂垂白親
各各違顏色晚舟泊沙渚我心倍

惻惻安得湘中鯉尺素達君側

二十四日洞庭舟中

俗呼臘月二十四日爲小年節

洞庭三日棹歲晚惜殘暉
水落湖身瘦沙平雁影微
酷密排作幕漁網不成帷
戶慶小年節偏子一葉飛

喜晤江南雲

喜見故人面渾疑夢裏看
不須論得失且共訊平安
往事碁殘局浮槎水旋瀾
爲君重感舊雙淚欲闌干
見我君應怪眞成漫浪游
寸心懸魏闕孤棹問江頭
冀北衝嚴雪金閫話早秋
莫辭譚竟晷此會頗難求

仲永檀字襄溪號樂園濟甯人乾隆丙辰進士改庶吉

士授編修歷官左副都御史有樂園詩草偶存

詩話樂園官侍郎奏請酌減上元篝火聲樂
裕陵漏自答之既又劾步軍統領鄂善及賅鞠實伏法遂

超授僉憲未幾又擢副憲命主文武會試並屢奉使
按事方駸駸大用乃以洩留中密奏下獄遽卒時論
惜之

途次卽景

雨餘秋色滿林叢攬轡遐觀四望同柳惹青苔身並綠柿
沾白露葉初紅遠山牧笛橫牛背近水蘆花拂馬駿薄暮
荒村聊對酒一彎新月透簾櫳

趙青藜字然乙涇縣人乾隆丙辰進士改庶吉士授編
修歷官御史有激芳居集

舟次淮陰用東坡淮韻

混混河水黃清清淮水碧二水會山陽蒸作城霞赤城下
遠游子暝煙趨水驛家山日以遠鴈字雲中隔朝來風力
柔未可發洪澤人生秉素志所貴能自適有河恣長飲滿

腹願已畢不見貪者勞那知靜者佚王孫出袴下名亦垂
金石學道胡不爲功成徒見疾

夢王翦林先生

束髮識君名少長識君書識君官給諫得罪江干居江干
日無事愈復究蟲魚人閒得片紙珍似蘭亭初健筆旣淩
雲清腸甘野蔬寂寞謝冠蓋瀟灑理耕鋤我生實已晚天
涯竊緒餘忽得營營路告我以君廬扣門欣題鳥轉盼失
庭除鄰雞催月上惆悵趣巾裾

李師中字正甫號蝶園高密人乾隆丙辰進士改庶吉
士歷官御史

過開山

濟南南去路嶺壑幾千盤一水來回過亂山前後看角聲

孤戍迴人影夕陽寬何處聞雞犬孤村樹色寒

過富陽

別卻錢塘去連峯取次開
勝搖修竹裏帆挂古城隈
水急知灘近山昏覺雨來
春江樓第一舟過首重回

朱嘉善字懷遠號怡齋天津人乾隆丙辰進士歷官刑部員外郎

西山晚步

沿溪芳草費幽探山色青青滴晚嵐
竹外桃花花外水水雲深處結蘿庵

湯聘字莘來號稼堂仁和人乾隆丙辰進士官至湖北巡撫有稼堂漫存彙

重游東皋卽事呈同游諸君

春水平隄一艇橫杏花深處話浮生小橋隔岸時通馬細
柳如煙不礙鶯誰抱素心輕富貴我從醉眼識公卿莫教
風雨閒相迫葉葉枝枝鬪曉晴

王顯緒字維彰號之巖又號閩軒福山人乾隆丙辰進
士歷官安徽布政使有蓮城集燕山小草

詩話閩軒傳涉經史官刑曹十年宋文端頗器之出
領提刑多所平反準鳴爾之役參軍事丁丑歲自波
羅河屯監準噶爾浮檻車
詣京師集有詩紀其事

鄂爾楚克哈達帳中漫興

曉岫秋陽雲半吞午來盈谷換春溫茶烹蟹眼析泉水香
熬鴟頭老樹根邀醉黃花憐未放供書紅葉悵無存辛勤
逾月眠風帳空對東山謝相墩

中秋雙黃寺道中

盼到良宵仍客邊
恩恩鞍馬夕陽天一環
水曲叢煙遠十笏
山尖吐月圓
斷續鐘聲梵王刹
高低帘影酒家塵
去年此夜經行地
今日重來覺宛然

全祖望字紹衣號謝山鄞縣人乾隆丙辰舉博學鴻詞

成進士改庶吉士授知縣有鮎埼亭詩集

詩話謝山負氣忤俗有節慨相傳爲錢忠介肅樂後
身年十四從董正國學編讀里中范氏陳氏藏書復
從武林趙氏借所未見書學淵博無涯矣上哉山端
溪書院究心鄉邦文獻表章節義如不及故集中闕
幽發潛之作爲多

秦淮河房追懷復社諸公

橫議多緣世道衰
黨人亦自蹈危
菑賓寮豔說四公子
芒角猶傳三茂材
耕巖次尾崑銅也
歷詆太牢原過激
得沈白馬有餘哀
秦淮水畔行遊地
嗚咽寒潮帶雨來

燕子磯蘭若尋蒼翁題字

江東王氣已全枯，豈有重興赤伏符。
半夜秋風出靈谷，千船軍火竄焦湖。
孤生逐日空三足，碧血沈淵尚一壺。
此日彌甥輯遺事，可憐題字竟模糊。

今年春雨極多而吾鄉水無儲蓄
四月中洩錢湖以種稻數日又竭有感而作

七鄉旱洩錢湖水三日俄成涸，
鰲魚天帝似應憐。瘠土杞人空自念，
農書誰家閉糴思。安枕有吏催科尙滿車，
自古勤民在溝洫。長官何以奠句餘。

宣房浦澤未全消，蒿目流民歎不毛。
萬戶盡資農部食，諸君誰念聖躬勞。
猶傳淮泗河防亟，又報荆吳米價高。
天末逐臣如鷄鼠，驚心先在甬江皋。

澄湖舊足三河注嘉澤誰將片石磨憶昔置田驅積葦干
今搏土闕洪波饑金穰木原難料堰廢隄荒可奈何夜向
重霄覘月暈神皋那得驟滂沱

夜與谷林坐天目山房看月談及倪文正公築靈臺
以種竹乃以徽墨塗壁谷林欣然思效之率爾有
作

衣雲閣外萬竿竹絕地累土高十尋尙書於此著兒易黃
芽競茁蒼精吟夢吞三爻美東箭老人猶自有童心童心
太古乎又乎

兒易序中引太
乎童鳥爲說

黜墨餘波四壁淋坐教天都

賢太守兼車十笏貢南金歛谿石液愁竭澤黃山松鬣嗟
焚林方程夜共山鬼泣風篁颯颯傳哀音通人好事成奇
癖而今但有荒邱岑我過始甯淚滿襟昨宵山房看新月

庖羲一九正在參危坡絕頂更如砥古牆八面都成陰龍
飛鳳舞遠峯至蒼茫茸薄傳寒礎酒闌爲話平泉舊主人
不覺懷古深頓擬高置此君座卧聽空中戛琅琳研田殘
膏足挹注黑雲垂天清不淫更須我撰大招詞追招尙書
聽素琴祇憂直節不復見荒山月黑空蕭森

重三日偶然作

東風漸放青宿草不可踏蒼龍爲之怒連朝呼拆茨夜聞
萬蟄蟲蠕蠕更霄霄所憂玉蘭花魂散難爲攝江干士女
殷索居阻步屣苔痕上綠階墨雲染白帟天方啟闔餘客
無怨沾溼且待含桃登重理永和帖

南皋見子甬上耆舊集中所錄錢侍御帝里篇而歎
賞不置卽和其作

琅琦江上無寸土重趼歸來淚如雨側身且作蘆中行
飛頻爲弋者驚頭顱出自鮫人室剩餘一絲不我絕莫道
我身鴻毛輕雄虹光照枯燐青揚雄符命那可讀高廟聞
之鬼夜哭不見茂陵秋芒芒夜聞馬嘶何處望嗟哉我家
故粟里回首徒傷急景駛袖中尙有一卷書我兄幕府之
留餘十年以來長箝口明夷於股更於肘祇應投之九天
門天門詖蕩白日昏與人家國良多事一夢栩栩還起
起是誰讀之叩鉢催染毫重吹九死灰謝翱方鳳良俊物嘔
出當年朱鳥血

碣石行

故都御史華亭徐公孚遠乘桴廿年從亡道梗由安南入覲安南要以臣禮不屈而歸所傳交行集者也歸而同延平入臺延平亡臺軍漸削乃復入中土栖遲無就至碣石依宮保總戎吳君六奇竟以完髮終其野死爲可悲其得保顛毛則亦僅有之事也吾獨壯矣君之出自賤微草竊

而能爲天下留貞臣之命使得以無恙威儀入地是亦絕世之奇矣世人但舉查職方一事以爲佳話豈足以盡之哉宜其克享功名歿遂順恪之謚也若田間先生謂徐公歸自安址卽留碣石則謬矣抑國史吳君傳中亦應大書者也

子遺孤臣頭雪白不死東甯死碣石吾戴吾頭吾知免一枝幸藉將軍力冥鴻何處覓安宅老羆帳中堪避弋鷓鴣不敢加彈射幾社故人最生色夏公感歎何公喜更有陳公同太息相與驚魂且動魄謂斯人者從何來古心所照天地碧碣石風雷生畫戟誰知中有柳車客海王聞之司眠食朝看揚朝夕重汐在昔韓王亦無輩竟賣鍾離足長喟

七星巖

天帝當年啟大樽七星羅列似兒孫洞門尙有歌鐘在石

室將無祕錄存自昔湖山煙水闊于今阡陌草萊焚何當
反復謠黃鵠用瀉灘江春漲痕

白日伊誰巧琢成離奇變幻有神明乳泉上接天漿落斗
枋遙疑石筍擎山鬼空中驚爆竹詩人傍午作題名老夫
蹇足徒惆悵病後探幽不勝情

黃永年字靜山號崧甫江西廣昌人乾隆丙辰舉博學鴻
詞成進士授刑部主事歷官常州知府有奉使集金陵使院寄劉給事蘭谷少尹謹齋

層樓雲入坐小架翠成帷遠憶聯吟處煙蘿一角垂鐘殘
秣陵外鳥下夕陽西無限江南思裁詩月上遲

鄭燮字克柔號板橋興化人乾隆丙辰進士官濰縣知縣有板橋詩鈔

阮芸臺曰板橋以歲饑爲民請賑忤大吏罷歸其詩云長官好善民已愁况以不善同民攸真至言也雖縣人感其政至今寶其書畫多有效其體者詩不拘體格興至則成頌近香山放翁詩南樵曰先生少孤貧讀書成甲科授邑宰現身說法民皆安堵息訟管於公庭步月作詩寫畫六房如水使去無人所作詩詞皆手書付刊先生不以詩鳴然述事言情無不測測動人誦其詩可知其志矣言話板橋畫書詩號稱三絕自出手眼實皆胎息於古詩多見性情荒率處彌真摯有味世乃以狂怪目之淺矣道情十首乃樂府變格豪情逸韻與熊魚山萬古愁曲相頡頏亦可傳之作

揚州

畫舫乘春破曉煙滿城絲管拂榆錢千家養女先教曲十里栽花算種田雨過隋隄原不溼風吹紅袖欲登仙詞人久已傷頭白酒暝香溫倍悄然

廿四橋邊草徑荒新開小港透雷塘畫樓隱隱煙霞遠鐵板錚錚樹木涼文字豈能傳太守風流原不礙隋皇量今

酌古情何限願借東風作小狂

西風又到洗妝樓衰草連天落日愁瓦礫數堆樵唱晚涼
雲幾片燕驚秋繁華一刻人偏戀嗚咽千年水不流借問
纍纍荒塚畔幾人耕出玉搔頭

江上澄鮮秋水新邗溝幾日雪迷津千年戰伐百餘次一
歲變更何限人盡把黃金通顯要惟餘白眼到清貧可憐
道上飢寒子昨日華堂卧錦茵

鄴城

劃破寒雲漳水流殘星畫角動譙樓孤城旭日牛羊出萬
里新霜草木秋銅雀荒涼遺瓦在西陵風雨石人愁分香
一夕雄心盡碑板仍題漢徹侯

悍吏

縣官編丁著圖甲悍吏入村捉鵝鳴縣官養老賜帛肉悍
吏沿村括稻穀豺狼到處無虛過不斷人喉抉人目長官
好善民已愁況以不善司民牧山田苦旱生草菅水田浪
闊聲潺潺聖主深仁發天庾悍吏貪勒爲刁奸索逋洵洵
虎而翼叫呼楚撻無甯刻村中殺雞忙作食前村後村已
屏息嗚呼長吏定不知知而故縱非人爲

撫孤行

十年夫歿扁書籠歲歲曝書抱書哭縹緗破裂方錦紋玉
軸牙籤斷湘竹孀婦義不賣藏書況有孤雛是遺腹四壁
塗鴉噴不止十日索墨五日紙學俸無錢愧塾師綫腳鍼
頭勞十指燈昏焰短空房黑兒讀無多母長織敗葉走地
風沙沙檢點兒眠聽曉鴉

小廊

小廊茶熟已無煙折取寒花瘦可憐寂寂柴門秋水闊亂
鴉採碎夕陽天

題游俠圖

大雪滿天地胡爲仗劍游欲談心裏事同上酒家樓

李氏小園

小園十畝寬落落數間屋春草無穢滋寒花有餘馥閉戶
養老母拮据市梁肉大兒執鸞刀縷縷切紅玉次兒拾柴
薪細火煨陸續煙飄豆架青香透疎籬竹貧家滋味薄得
此當鼎餼弟兄何所餐宵來母贍粥

晨起縫破衣鍼綫不成行母年七十四眼昏手又僵裝綿
苦欲厚用綫苦欲長綫長衣縫緊綿厚耐雪霜裝成令兒

暝母衣單薄涼不衣逆母懷衣之情內傷

范縣

四五十家負郭民落花廳事淨無塵苦蒿菜把鄰僧送禿
袖鶉衣小吏貧尙有隱幽難盡燭何曾頑梗竟能馴縣門
一尺情猶隔況是君門隔紫宸

登范縣城東樓

獨上秋城望高樓出曉煙西風漳鄴水旭日魯鄒天過客
荒無館供官薄有田時平兼地僻何況又豐年

逃荒行

十日賣一兒五日賣一婦來日贖一身茫茫卽長路長路
迂以遠關山雜豺虎天荒虎不飢肝人飼巖阻豺狼白晝
出諸村亂擊鼓嗟予皮髮焦骨斷折腰脊見人目先瞪得

食咽反吐不堪充虎餓虎亦棄不取道旁見遺嬰憐拾置
擔釜賣盡自家兒反爲他人撫路婦有同伴憐而與之乳
咽咽懷中聲呶呶口中語似欲呼爺孃言笑令人楚千里
山海關萬里遼陽戍嚴城嚙夜星村鐙照秋澣長橋浮水
面風號浪偏怒欲渡不敢攖橋滑足無履前牽復後曳一
跌不復舉過橋歇古廟聒耳聞鄉語婦人敘親媼男兒說
門戶歡言夜不眠似欲忘愁苦未明復起行霞光影踽踽
邊牆漸以南黃沙浩無宇或云薛白衣征遼從此去或云
隋煬皇高麗拜雄武初到若夙經艱辛更談古幸遇新主
人區脫與眠處長犁開古蹟春田耕細雨字牧馬牛羊斜
陽谷量數身安心轉悲天南渺何許萬事不可言臨風淚
如注

還家行

死者葬沙漠生者還舊鄉遙聞齊魯郊穀麥等人長目營
青岱雲足辭遼海霜拜墳一痛哭永別無相望春秋社燕
雁封淚遠寄將歸來何所有兀然空四牆井蛙跳我竈狐
狸據我牀驅狐空颺鼠掃徑開堂皇溼泥塗舊壁嫩草覆
新黃桃花知我至屋角舒紅芳舊燕喜我歸呢喃話空梁
蒲塘春水暎飛出雙鴛鴦念我故妻子羈賣東南莊聖恩
許歸贖攜錢負橐囊其妻聞夫至且喜且徬徨大義歸故
夫新夫非不良摘去乳下兒抽刀割我腸其兒知永絕抱
頸索我娘墮地幾翻覆淚面塗泥漿上堂辭舅姑舅姑淚
浪浪贈我菱花鏡遺我泥金箱賜我舊簪珥包并羅衣裳
好好作家去永永無相忘後夫年正少慚慘難禁當潛身

匿鄰舍背樹倚斜陽其妻徑以去繞隴過林塘後夫攜兒
歸獨夜卧空房兒嘯父不寐燈短夜何長

王立性字太初高密人乾隆丙辰進士官婁縣知縣有
小峨嵋詩集

旅夜

霜碁與風笛並作異鄉聲江月正當戶海雲低壓城草深
螢乍出樹響鵲頻驚志士多牢落無爲恨不平

金門詔字軼東號東山江都人乾隆丙辰進士改庶吉
士授知縣

過趙北口

春風雲暝破春妍楊柳青青早放顛亦似江南湖水碧片
帆吹過打魚船

萬光泰字循初一字柘坡秀水人乾隆丙辰舉人舉博

學鴻詞有柘坡居士集

詩話柘坡穿穴六藝排比百家著述甚富尤精於周
髀音韻諸學其詩精鍊瓌麗病篤時手自編定僅七
百餘首外有古文詩
餘均自綴去世不傳

和家兄敬懷秋日閒居

燕來育羣雛雛出燕欲去單衣未歸篋複衣復當絮跋烏
迅不停顧免疾難御微茫造化機舉手作新故愚夫懷干
憂志士亦百慮何如蟋蟀詩行樂歲聿暮

城市眾所驚清曠還郊坰春萋媚柔綠秋至果實零野雀
晨俱來網蟲夕可聽嗟彼窮巷士短褐僅蓋形平生相牛
法肯易相笏經浮雲去皎皎晚日空庭青

瘦尊含古制洗琴鞞奇曲席門無高車樞斷繩自續比鄰

二三叟但話桑麻俗飲水侑亨瓠翦韭佐脫粟百年腐儒
餐粗糲願已足

登高望湖涘厯厯明帆檣朝來小陰翳正晝仍驕陽曝布
標長竿曝書滿竹牀雨聲忽東至溼我羅衣裳陰陽多變
化有目迷翕張衣禱戒旣濟甯謂勿過防

露晞岸草黃霜落林葉赤連畦種汗萊各有鹵莽獲篝車
陌頭載墉櫛屋後積南山落豆萁伏臘缶自擊吾生寡筋
力幸辨菽與麥伐檀感風詩素食徒挾策匡衡世農夫揚
雄豈仕籍驅雀彼何爲今人不如昔

禪藻齋觀元鮮于伯機草書嵇叔夜與山巨源絕交
書卷子

虎林隱吏困學民風流自擬晉宋人晚年裘馬氣俱斂落

紙具有湖山春草書雄壯妙入神上追米薛下筆親泥中
輓車何筆法亦如舞劍師裴旻嵇康絕交書最古七不堪
辭山吏部抱琴自爲鴻飛高肯向塵埃薄湯武柳陰無暑
貴客來不聞不見驅車回廣陵散今遂絕矣山巨源終安
在哉右軍將軍會屬筆摹本鮮于復其一龍騰雨墜奇勢
存想見臨池心手疾同時幾輩成煙雲此卷幸遲松雪焚
六丁雷電取不得知子守護誠辛勤辛勤守護何人識斷
楮零縑增太息墨池昨夜瘦蛟橫山雨吹窗晚風黑

泛舟淮安城西歷游湖上諸園晚歸遲月

長隄如井眉城邑在井底平疇通酒壚斜陌截腥市綠溪
見漁父迷路問蘆子纔遵短笻行卻喜單舟棹晴沙秋練
淨遠綠春煙靡數灣迹已深一席輕可使微吟聊自賞默

會興何已停橈復潭陰草色動圓水

林廬在水次緯壁皆赤蘆不爲華丹飾未失漁釣徒粉籜
放新竹錦英纏朽株熙熙數鄰家窺客衣短襦終年飽淮
米復飽魚與苽農桑洵可樂金紫誠奚須曉煙一鳩應拂
水雙燕俱感時春令過傷遠羈情孤長軒更流憩細谷平

風湖

枚生作賦處垂柳青依依東皇妒青眼團作飛絲飛攀條
欲贈遠繞樹風吹衣流萍俄已滿晚日將無歸歷歷鷺依
岸明明魚擁磯潛聞蘆雨澀盡卷蒲煙微棲禽噪林隙孤
磬開僧扉明鏡水面靜圓月城隅輝卻願共游處亂雲迷
夕霏

香河車中晚行

乘黑僻店門落月猶在屋冒寒度冰河夾岸起羣鴛微霜
灑凍面側望半枯瀆葦蕭條空渚洲窈窕復雙輪曳麥
壟厯塊何碌碌下有豚耳蔬時誤拂馬腹是皆瘴瘵婦拮
据備冬蓄民生職在勤物理報亦速高城忽在邇灰嗑昧
兩目解鞍息前林草率具湯沐凝雲沈斷堞孤塔聳平陸
古道一徘徊殘碑半堪讀

城西南陳氏園看芙蓉花復至真如寺

市南壓長虹湖尾置別墅廣除闢翠寒圓沼瀦曲阻幽花
孤且晚玉潔秀葉楚懿茲深谷芳媚色乃貞處游儵萃眾
樂鳴鳥矯一舉避客久未來沿流復登渚

宰官發洪願捨宅城南陌佛爪久紛飛浮圖鎮遺跡秋光
相輪淨鈴語西風隔遙看野鷗盤片段殘霞赤前村穉

熟細路牛羊夕更戀石闌斜松聲散晴碧

和坤一咸和四年甄歌

春雲作泥花作土客子還家十日雨刺船問友城東門魚
市曉鯉河水渾主人居廬顏色悴積潦盈階苔滿地一甄
得就牆陰看上有咸和四年字質如石重棱矩方盈尺不
足盈咫強蘊沈旣深于性靜薜暴不著其工良主人昨客
臨溪水日有永安山在几耕人掘地侵土龍鄰叟分詒共
石髓我聞晉陶久不全南宋僅贖保母甄交螭方壺地下
破興甯寶刻人間傳是甄後出與爲二能記倉黃渡江事
四郊不壘蘇冠軍百甃定運陶刺史燒甄誌年謀亦周千
齡卧聽松梧秋誰憐衣襦仍發冢亦有牧豎來登邱餘不
亭高山鬼睇薜荔女蘿知幾世誰能更覓沈約墳我欲再

補石柱記主人枕出復食貧弔鶴不至嘯鳥馴歌詩已廢
蓼莪句塽土正待燒甑人嗟我將爲粵行客歸期遙指江
楓赤且留銅雀香姜材換取梅花蕉葉石

雨不得至鄧尉

湖外垂雲向夕冥湖頭密雨灑窗櫺梅花暗落干林白
鐙影閒挑一夜青踏雪多年期佛屋衝泥咫尺阻漁汀
雞鳴敲枕瀟瀟甚且當還元閣上聽

送廷簡歸杭州兼柬大宗西顥曦亮竹田

草色微茫雪滿河燕南二月未春和尋常保社催花雨
忽漫離筵折柳歌獨往還山京國隔相憑寄字里門過
羈留迅邁俱無定不用臨歧感涕多

青雲有路孰彈冠白日無繩自轉丸衣食驅人難閉戶雲

山招客易投竿晨車願化飛塵送夜店須回落日看湖上
故人多寂寞臨風亦望訊平安

李海觀字孔堂號綠園寶豐人乾隆丙辰舉人官印江

知縣

天津丙德庵夜坐

舍舟登陸夜蕭寺冷光多月皎松園壁風寒鳥夢柯開箱
書有債倚榻睡無魔藉此消愁緒晨鐘待若何

登大梁上方寺鐵塔絕頂

浮圖百尺矗秋光螺道盤空俯大荒九曲洪波來碧落兩
行高柳入蒼茫宋宮艮嶽埋淤土周府雕垣照夕陽惟有
城南岑蔚處吹臺猶自說梁王

孫廷權字天衡海鹽人乾隆丙辰舉人官天門知縣有

宦楚吟稟

巖門

疊嶂高於雲人在雲之上混茫一氣凝罡風不能颺萬柄
 青芙蓉亭亭盡舒放俗塵我已離奇觀誰所貺遠郭浮蜃
 樓孤村縈蟻壙密疎棊布局連斷卦分象偉哉真宰功頃
 刻呈千狀數折入巖門厥勢更雄壯危崖碎欲傾亂木森
 相向龍虎久鬱蟠何年方得暢王公重設險茲山為保障
 竊據何代無乘機扼其吭平羌策自良改土事為創列戍
 戢干戈職貢登纁纁休教伯圖啟敢與王師抗戎馬限雖
 宜榛荆關須曠致遠舟車通深慰黎民望

自生橋

兼山忽中分屹屹勢難動絕澗駕修梁有馬不能縱誰運

昆吾刀雌雄截蟬螻輕捷與蹯跚到此兩無用造化設危
機恐遭倉猝中如隨地軸迴未許天門狃入險羣猿迎出
險怪禽送勞生敢告勞痛定還思痛安得奇肱車萬里雲
程控

苗刀歌

沙渠十司悍且豪大爲容美小散毛納地久降諸崗長尙
存苗種懸苗刀此刀出匣三尺水吳潭素練翻秋濤春鵬
長尾自皎潔鵬鴉安用尋常膏蠻兒矯健逞身手累年剽
掠橫相遭官軍緩攻議剿撫民居雜處思奔逃留茲利刃
經戰鬪往往深夜聞鳴號卽今向化買牛犢兼有就學嫻
風騷朝廷德威加四海金兵不向皋蘭塵羅平妖鳥避鷹
隼大宛天馬隨蒲萄東南自充財賦數零星荒土輕秋毫

形影卷四十一
三
我來割符已數月喜見風俗勤耕陶蠻君發冢一十二蒼
藤綠樹嘯猿猱莫安有方賴守牧奸宄屏蹟弓矢設此刀
棄置常不用遙看日月霜天高

永順道中

置散成羈旅搜奇惱化工嘯歌三楚外行卧萬山中冰雪
心難熨煙霞路易通夔州諸詠在一和少陵翁

曹復元字興門號月帆上海籍嘉善人乾隆丙辰舉人
官林縣知縣改溧陽教諭有六榆散人草靜甯室詩

鈔

縛雞行

舟人買雞江岸邊轉賣鄰舫趁客錢船頭縛雞船尾殺釜
中湯沸命一霎豈知殺雞雞未殊驚飛帶血亂水鳧舟人

脫手空大叫更有鄰舟得而笑是時張帆舟難旋公然攘
之當面前吁嗟人事動多反覆買者垂涎攘者食肉

祝淫初名游龍字貽孫號人齋海甯人乾隆丙辰舉人

有日新書屋橐

送家兄豫堂歸省

風勁霜嚴臘正殘天涯兄弟別離難高堂夢遍歸期晚雁

陣聲驚客路寒一紙家書心懨懨時聞叔母病信三更茅店夜漫

漫園梅有信傳應早花發人歸一勸餐

于敏中字叔子號耐圃金壇人乾隆丁巳一甲一名進

士授修撰官至文華殿大學士諡文襄

秦系山房

春山寂寂洞天幽聞有高人此地留一夜桃花新漲急石

池猶認墨花浮

周煌字海山涪州人乾隆丁巳進士改庶吉士授編修

官至兵部尚書贈太子太傅諡文恭有海山存藁

李爾村曰漢司馬長卿奉命檄諭蜀中父老本朝周文恭公亦兩次奉命至蜀審案再至成都詩有云鄉

路遠分江內外儂家原

近瀼東西詩意頗自負全穆齋侍郎魁奉命册封琉

球王禹卿徐傳舟二客從之行至姑米山颯風舟壞

幸獲濟各有詩紀事可見當日海程之艱乾隆戊寅

與陳星齋王晉川同直上書房閱二十五年予告歸

存藁內集八卷皆應制之作外集十

二卷則在京師與奉使視學時詩也

夷陵晚泊
巴猿嘯不住一艇下青天遠水沈寒景高城起暮煙
獠亭
嗟漢日劫火憶秦年江上湘絃動愁余目渺然

齋敕出南臺舟次恭紀

入律蕤賓動琯灰

例以夏至後渡海

樓船帆正鬱崔嵬金章玉節

海邊出鼉鼓龍旗山外開

旗鼓閩中二山名

南國屏藩親祖送東

方陪隸仰昭回書生並有乘風願似此王程得幾來

鷓首雙高俯大洋遙知不日是扶桑先安廉石爭風力總
有恬波應國祥耀遠旌麾通浩淼凌空笳吹起潛藏明朝
底物常相對碧海青天日月光

游辨嶽

五嶽何年到十洲

琉球五嶽蓋是國人慕中華而倣名之

試從望海海全收

高處四面見海

城標故國鼎三足島界諸蠻蜃一樓古木帶煙山

閣晚虛巖迴日石壇秋停車問俗徵荒記說有叢祠祝祝

留

祝天孫氏女卽嶽神也

方正學先生祠

一紙徵書降紫泥，奉天門下奏華芝。齊賢名噪才難老，賈誼年輕策已奇。高廟有靈儲用日，微臣無命際危時。飛雲落月皆成讖，千古春心望帝悲。

諸公名姓榜朝堂，賞格初行事可傷。紫氣黃旗行已矣，繡裳丹屐轉荒唐。空多勸表傳三讓，只少頒書草十行。將虎批龍等閒事，倚天劍氣老鄒將。

謁嶽廟

大華岩堯曉正蒼，真源遙溯氣靈長。五材並用知金肅，萬寶初收識白藏。呼吸幾人能入座，兒孫列岫儘成行。西南正有三年克，早晚機槍掃鬼方。

發渝州

竭來桑下亦淹留，去住無端不自由。訟閣一鈴風試急，柘

枝聲裏出渝州

德保索綽絡氏字仲容一字潤亭號定圃又號龐村滿洲旗人乾隆丁巳進士官至禮部尙書諡文莊有樂

賢堂詩鈔

淨荷樓雨後卽事用謝宣城郡內高齋閒坐答呂法

曹韻

高樓何迢迢雨霽雲靄深新霞媚層嵐宿煙斂喬林四野靜無喧有客方孤吟何以說幽獨試奏朱絃琴邈然寄遙想古人爲知心荷氣散華沼竹風颺清音目送羣鳥還夕陽淡遙岑

明湖泛舟

湖影茫茫濛晚秋煙波無際碧雲流帆從水面亭邊落人

在天心鏡裏游

湖中有亭曰天心水面

千里襟懷誰共遠滿城風景

此全收官閒更有登山約遙指峯嵐最上頭

對面卽干佛山

春歸

百計留春春亦歸東君欲別更依依空庭夜雨醒殘夢芳
草天涯怨落暉繞樹乍聽鶯百轉銜泥驚見燕雙飛欲尋
紅紫無蹤跡花點池塘絮點衣

和白樂天浩歌行

雙丸旋轉無時畢三萬六千空計日步踏陳迹如磨牛彈
指流年行望七人生誰能滿百年懷憂千載真徒然回思
少壯駒過隙可憐照鏡非朱顏塵蹤已逝皆成故往事茫
茫不知處舉頭一笑清風生天外浮雲任來去君不見狂
瀾滾滾逐愛河幾人名利沒頽波不如有酒且成醉康莊

坦步無嗟我淨掃煩愁樂其樂興來聊復發長歌亭畔喜
看芳草綠窗前愛賞春陰多樂天長句真成達來者謂我
將如何

宿盤山史各莊挂月山房憶近亭亡弟

吾弟方垂髫昂藏負神力挽弓常挽強十五選善射箭作
餓鳴鳴橫空落健翮對撲熊館前決勝標英特出爲營闢
官挺拔聲赫赫巨鼎累千鈞手扛氣無茶駢頭千萬人聚
觀驚辭舌至今江淮間軼事尙傳說急流思退勇願作煙
霞客一朝解組歸盤谷築幽宅經營結數椽茅屋依卷石
地勢做高軒畦徑天然關桃李雜松杉一一皆手植泉石
愜心期城市少足迹高蹈不可攀懷念徒充積偶聞抱微
疴欲訪苦無隙驚傳凶問來傷心淚沾臆因知造化心清

福最所嗇今我來山莊人琴何所適封塵有書策掛壁留
劍戟諸子已林立頭角喜岐嶷墳冢近舍旁浮土尙新色
酌酒淚自傾悲痛情無極嗟予與近亭連理枝同脈孰知
壯者亡衰頹尙供職壽天理則那問天天默默

觀保字伯容號補亭滿洲旗人乾隆丁巳進士改庶吉
士授編修累官禮部尙書罷再起授左都御史諡文
恭

界亭

初識沅陵路盤陀費馬蹶寒泉崩石出峻嶺刻雲齊樹底
窺松鼠花間聽竹雞連朝多細雨磴道不成泥

宋徽宗畫鸚鵡

良岳工成殿宇涼珠簾深護海南香閒情卻試珊瑚筆解

語還勝翡翠妝毛羽至今猶鄭重衣冠當日太倉黃可憐
家法惟書畫南渡多才壽皇

荆門曉霽

經旬磴道窘躋攀雨雨風風未暫閒一徑遙連魚腹國羣
峯環赴虎牙關承平戍卒投戈戟豐稔村姑高髻鬟偶向
荆門回首望不知身入萬重山

山居

苔磴縈紆石徑封斷崖何處飯僧鐘亂雲滿壑不歸去知
在山前第幾峯

王會汾字菽服號晉川無錫人乾隆丁巳進士官至吏
部侍郎有梁溪集

札克丹鄂佛浴營觀蒙古騎生馬歌

札克丹營氣蕭爽沙坡澶漫連平壤諸蕃游騎爭驅入霧
鬣風鬣恣來往呼韓晚上羊雁羹幔城合奏琵琶曲終
更呈舞馬戲奚官碧眼虬髯猶鞭鞘一拂馬齊縱附尾緣
鬃不施鞚千夫疾躍萬夫唱雪花旋捲塵飛霧注坡騫礪
走僂僂舞袂交竿捷有神忽然墜地勢驚絕雙如健鶻翻
輕身舉後蹶前雙掣拽凌虛制變爭尾髮馬間出入馬不
知逸態雄姿轉相發至尊一顧神沖融人馬咸資控馭工
少府金錢服官綺拜恩蹈舞擎歸籠卡輪競出尋荒壘篳
篥喚風山月起御營鐙火燦華星萬丈煙光夜凝紫

林枝春字繼仁號青圃福清人乾隆丁巳一甲二名進
士授編修歷官通政司副使有青圃詩鈔

詩話青圃爲鄭幾庭甥少聞外家之緒論入翰林先
後視學河南江西輒與諸生開誠講授而土化之詩

清尚
可誦

登吹臺

木落雁聲哀
天風下吹臺
白雲飛不盡
平楚意悠哉
禾黍空郊遠
松篁古殿開
梁園詞賦客
車馬幾人來
把酒對城闕
悠然生遠心
宋梁餘舊壘
李杜此高吟
喬木風煙色
長河歲月深
多情思峴首
碑碣亦銷沈

任端書字念齋溧陽人乾隆丁巳一甲三名進士授編

修有南屏山人詩集

詩話念齋詩才宏富自少至老足跡半天下而得之
燕趙秦蜀山川之氣爲多陳向山謂其堅凝結體則
城互五言綺麗緣情則珠明七顆胡稚威稱其詩
瓌瑋殊麗自歷燕趙秦蜀所及愈遠所得乃愈多

夔州懷古

亂山深處鎖孤城
宇宙清秋尙鬱蒸
見說蜀王成杜宇
早

看秦火接夷陵虎牙天險憑關隘魚復江流感廢興今日
俞矛歌漢德片帆安穩浪紋層

平時夔子初分國後日公孫始作家白帝春秋迷草樹黃
牛朝暮起煙霞嘒猿路絕人居少飛鳥沙平陣氣斜閒倚
江船論往事長年高唱上三巴

馬伏波祠

伏波遺廟枕空山何限精靈去不還一夕明珠來海外千
年銅柱在人間功名自合高諸將伏臘仍看走百蠻長笛
臨風想遺曲武溪南下水潺湲

江濱廟

南紀開巫峽滄波萬里通旌幢朝水府雲霧悶靈宮風晚
神鴉集霜深古柏紅長檣紛估客歌舞歲時同

天津

賈舶連檣接粉圍綺羅燈火照芳春幾年碣石淪滄海千
里黃河下析津三月垂楊調馬路一隄明月打魚人長安
北望雲霞近偏接河東郡縣新

揚州懷古

九州何地最銷魂一夢揚州恨曉雲六代江山謝車騎千
秋詞賦鮑參軍城經蕪後青天古樓自迷藏白日曛贏得
朝朝喚愁處酒波如海汗紅裙

張若需字曙形號中峻桐城人乾隆丁巳進士改庶吉
士授編修歷官侍講

東巡盛京謁陵禮成恭紀

長白蜿蜒走幹龍鼎湖億載奠幽宮松楸儼扈千官肅巖

岫紛張萬旆雄石馬有靈森寶鬣玉衣宛在颯神風蒼顏
野老扶筇望三度金輿酌酒同

有邵家室肇開基陸海神皋百產滋故國東來過豐沛高
山西望識邠岐爐煙夾道陳香案歌吹闐闐漾畫旗共慶
京坻多黍稌太平天子上陵時

喬光烈字敬亭號潤齋上海人乾隆丁巳進士官至湖

南巡撫罷再起授甘肅布政使有最樂堂集

詩話潤齋起家牧令所至有宦蹟爲榕門相國所薦
拔其詩僅一卷附文集後氣格老健多記事之作亦
足徵其素蘊

棧道木偏橋易構以石俾安固永久

平時架飛梁伐木跨危棧往來雖藉通風雨亦多患常苦
推頽易隤阢駭相踐歲時勞工徒修役連夕旦何如計其

安堅脆易所便因之琢山骨結構法初變庚庚復坦坦漂
搖幸無游車馬秦蜀交虹蜺度天漢紀事成此章所期久
安晏

霍山

太岳記禹書霍爲冀州鎮中央惟土德極並嵩華峻積厚
恣蟠薄元氣富宣蘊仰觀何軒昂騰霄意不盡青排與翠
竦峰嶺擢戈盾蒼紫障日迴凌標冠霞近神靈闕杳螻秩
祀嚴薦晉尙聞竹節書使者去方迅於今配侯伯福物道
無吝功美雲雨施歲被千里潤歌詩展然作庶用備贊儉
鶴鵲樓

何處西風鶴鵲樓煙沙蕭瑟滿汀洲人間俯仰成千古到
海黃河日夜流

夏縣謁司馬溫公墓

條山蒼蒼河水黃大賢鍾毓非尋常兒童走卒識君實至
今青簡生輝光天將元老資有宋范韓文富道繼昌公乎
正色發偉議伊訓說命同敷揚傳聞中國相司馬遼人拱
手戢朔方奈何功德未及竟鳳凰忽逝麒麟藏轉使奸回
竊國柄碑刊元祐覆紀綱當時墓碑題御筆清忠粹德昭
焯煌鉅手萬言勒神道學士振藻鏗琳琅一朝被讒忽摧
毀馬鬣空見斧與堂墓門閉向六百載公名自共河山長
整冠下拜瞻且肅松柏聲入清風香

錢琦字相人號璵沙仁和人乾隆丁巳進士改庶吉士
授編修歷官福建布政使著有澄碧齋詩鈔

詩話袁簡齋序璵沙詩稱其立朝有風節仕外多惠政雖官尊雅好爲詩其神清其韻幽曲致而不晦於

深直言而不墜於淺又爲作志銘言其海外諸詩尤
爲雄偉蓋與沙詩派與簡齋相近告養回里母年近
百齡與簡齋同有天倫之樂故歸興詩云九
十高堂七十子多勞傳說滿江城亦紀實也

同顒齋嵩霞皋亭看紅葉卽事

長空霽煙霧幽意何淒悄乘輿訪東皋挈伴踏清曉是時
秋云暮萬木就枯槁愛茲楓林葉冷挹霜華飽灼如夭桃
鮮爛若晴霞繞曲折緣樹行一路恣幽討信步不知遠誤
到境逾好忽逢田舍翁招邀入深篠茅茨三五間夾以翠
竹篠到門引客入禮法互草草老甕斲新開山莊地不掃
橘摘簷前枝魚網門外沼遠岫出重雲疎林鳴雜鳥俯仰
身世忘乾坤草亭小引觴漸頽然夕陽沈樹杪拂衣辭主
人夾路晚煙裊涼颼醒醉眸枝枝紅未了矯首發長歌清
音出林表良會亦須臾美景詎常保不見紅葉紅轉眼隨

秋老寄言素心人靈根慎自葆

浦城坐清流船南下獨酌成詩

軒然大波來洶洶千山萬山磨銛鋒山與水鬪水突怒雷
霆席卷蛟螭宮天吳海若驚奔衝短兵狹巷交撐撻掀翻
海藏水倒立鼉柱孤砥愁無功一灘未平一灘起聲勢益
復增強雄仙人斂手佛避舍烏嘯鳴叫天冥濛清流船薄
薄如紙鐵臂往往矜梢工一人船頭立搖手指揮如意憑
西東卒爾首尾擊則應一人急起追而從中央四人齊蕩
槳分列左右排軍戎初從石罅盤屈曲長城敢以偏師攻
忽然一發不可控銜枚疾走乘天風爾時從者皆失色少
見多怪心恹忡我生賦性最愚拙死生得喪憑天公壁上
觀兵真偶爾芥蒂那復縈胸中梢工勸我勿開口翻雲覆

雨君知否前頭又是惡灘來估客年年遭擊掇爲工一笑
起推蓬寂歷斜陽明遠阜談笑風波信有之不如且盡樽
中酒

灘河雜詩

忽聽驚濤響似雷水軍怒挾海潮迴神矜靈應留竒迹天
縱山川騁異才寒雨連宵摧落木夕陽終古照蒼苔從今
不怕風波險直向風波窟裏來

後渡海

島嶼灣灣三十六孤蓬夜向灣頭宿殘釭未滅鼓鼕鼕又
趁寒潮出海角海角有路惟青天海角有水如蒼煙帆幅
斜敲高浪腹船梢倒立遠峯顛中有老魚跳波出大者十
丈小七尺腥風怪雨吹幽荒甲角牙鬚森劍戟須與鯨鯨

形跡卷第四十一
三十一
爭潛逃珊瑚倒影翻銀濤遠岸入雲青
暮暮盪纓插竹絲
蕭蕭三三兩兩漁舟聚習水如飛
導前路漢使秋乘斗畔
槎漁人春入桃源渡萬家煙火畫圖中
沙礁鐵綫鎖重重
魚龍窟抱鯤身曲虎豹關開鹿耳雄
此時正值春光好
綠陰夾岸風嫋嫋
載得恩波較海寬
回頭一望滄溟小

秋日重登赤嵌城

一自兵銷日月光
牛皮尺地幻滄桑
空餘芳草埋荒堞
無數殘鋒卧夕陽
歌扇舞衫春寂寂
海潮山月夜茫茫
重來不盡登臨興
與何處秋風是故鄉

龍湖島

涼風從西來幽意散清曉
朝過灣裏溪午上龍湖島
島勢曲如盤湖光澄似沼
水氣忽蕩搖山雲互繚繞
遂有湖中

龍遊戲現鱗爪其上浣雲亭八角撐天表俯瞰島與湖一
幅米家橐坐久不知疲夕陽催歸鳥因憶故園山環湖青
未了廿年牛馬走湖山笑人老迺於瀛海外好景恣搜討
所得償所失自計頗不少凡事有夙緣益悟造化巧前望
綠迢迢天涯指芳草

柳泉道中得漫士侍郎留徐州待余之信喜賦長句
一片秋雲織秋曉瘦馬衝泥行草草長路二更時夢公覺
視飛鴻在天杪昨宵帶雨入江南短章欲報雙魚杏徐州
自古號雄封天上黃河九曲繞張騫奉使早乘槎支機片
石恣搜討我來恰好問河源定識相逢兩絕倒人生遇合
有前緣我嫌太遲公太早明朝趨步緩隨公江上數峯青
未了

袁簡齋得余歸信以詩寄投次韻奉答

聲聲嗚鳥勸提壺得遂初懷本不圖老樹幾株閒侶伴方塘半畝小江湖筵前奉母攀花舞醉後呼兒當杖扶多少邯鄲枕上客問他此樂夢會無無限離懷託酒卮挑鐙重檢篋中詞眞如仙爪搔逢癢那有官聲掩到詩塵積琴樽閒拂拭園荒松菊急扶持相將共訂名山業爲遣飛鴻預寄知

國梁榜名納國棟哈達納喇氏字隆吉一字丹中號笠民滿洲旗人乾隆丁巳進士改庶吉士授吏部主事

歷官貴州糧驛道有澄悅堂詩集

詩話笠民詩多詠其宦游所至山川風土而於君親兄弟朋友之際尤惻怛動人善寫性情間涉淺俗其五友集文石詩則以詩爲戲者也

逃暑

結廬俛澗波妙與前山值好風起菰蔣騎陽散薜荔長林
綠天垂怪石雲根墜荷珠凝幽香松濤破殘睡散髮坐迴
磴萬木落寒吹晨露午未晞碎滴逐鳥翅有時臨清漪掬
月弄空翠濯足見長脰鷺立逢魚忌隨意讀道書信步過
僧寺琴從樵夫聽酒共漁父醉因之得靜機何處容塵漬
勞勞念征夫衝暑鞭疲騎侯門誰家子日中候通刺

秋愁蘆塘道中作

弱歲愛秋爽不知秋氣悲屈宋倡哀怨藝林多微詞中年
漸知味古人非吾欺經今將半百百感叢幽私攬衾中夜
起非爲生別離無故坐嗟歎非關老與卑有事忽如忘無
事或不怡邇來日邁征貿貿駒隙馳秋亦不暇問悲亦不

暇思只有夢境惡亂綫不可治中腸忽怦怦衝心寒一絲
此間有鬼物憑之不自知安得長邁征兼無夢寐時

登金山謁禹王廟

古廟依懸壁高臺俛大河拍天浮日月撼柱擁鼉鼉樓櫓
千章立船橋一葦過登臨懷禹績風雨暗層波

還至鎮羌道中雨望

嶺上嶺下綠煙迷山南山北沈雲棲乍疏乍密衣上雨或
隱或現溝中泥谿頭谿尾石齒齒車內車外風淒淒去時
川原空如洗彌望草色今萋萋便似拏舟荷花蕩只少蓮
臉嬌紅嗔到眼翠碧遠無際空處透出青玻璃冷雨一夜
落羣峭玉山上與浮雲齊大塊變態遽如許是誰渲染無
町畦儻非大米卽小米中有濃澹無標題或是馬牙絕頂

蕪積雪灑作墨瀋摩天倪醉中索解人不得仰天長嘯干
峯低

過石佛山因寄北園老人

老龍夜半不守窟牙爪怒張來陰暝風雨收歇無處遁蛻
遺團結堆高青鱗甲剝落縵紋細不須開鑿煩五丁峭壁
裕衍疊嶂巘層巒窳窳橫巖坳四山攢綠疑無地回望但
見煙冥冥中有一峯最聳秀左撐右拄開重肩森森劍槩
刺空上欲墮不墮含瓏玲雙洞嵌空出飛鳥一佛危坐當
孤屏楊瓊眞伽或未到人刻此莊嚴形繞足有泉流碎
玉雅奏終日清泠泠有時浩不辨牛馬奔騰赴壑驅雷霆
楊氏西征此深入傳聞姓字殊非經地勝未以名人著或
是晦跡藏仙靈清游往復百不厭但惜車馬無留停柳陰

籬舍動欣賞便擬高結山間亭
猛憶北園老居士看山趺坐常惺惺
不如移置北園側相與悟真散賞逃天刑

寄鶴珊弟

總角從君游頭顱各如此十年中乖異暫聚差可喜
浹旬互送迎積懷不暇理社燕與秋鴻途遇空爾爾上林君一枝天涯我萬里
意行無近遠我夢亦如是時時把君臂依依見文史境過一欠伸中宵披衣起
人言作郡樂作郡真不美列城掩孤聰萬夫叢一指人善無足云人過我先恥
人求我恐後人取我所鄙不解效脂韋那能利爪嘴簿書日糾纏禍害相依倚
以此念家山鍵戶合掃軌況有老兄弟至樂誰得似對牀風雨中雞鳴殊不已

葉縣道中

豈及瞻黃城淪漪愛澁水黃城多山田土膏一何美已無
問津人尙見耦耕子澁水昔不流昆陽叢戰鬼青燐夜無
光太平今久矣葉公玩龍臺何處存遺址空令茅店壁侈
傳道元紙王喬號仙令朝天雙鳧駛亡何下玉棺一卧不
肯起今古一邱貉憑弔亦徒爾墟里人穰穰道左豕纍纍
逐逐馬輾塵登頓我未已惟當讀好詩清風濺霜齒

冷溪谷蒙道中

無醫能療煙霞癖有興還爲長短賡山勢屢翻新畫譜溪
流皆作遠松聲戀枝黃葉風留住繞石青魚浪打行秋色
向人句好句詒癡符自笑顏頰

過天井塘天半寺

天井春演漾湛然沈淨綠誰淬古銅鏡鑄此清一曲云昔

是紺宇一沈不可復貝闕虛堂皇龍宮靜肅穆寶氣至今
存往往浮磬玉從茲陟高巘鳥道神刺促旋經天半寺梵
唄出巖腹逡巡逾寺顛迴望在山麓青穹去尺五白雲生
兩足羣峭奔眼底紛如水波蹙因之念天井高岸已爲谷
焉知滄海淺不作桑田熟高下隨所遭奚事煩龜卜龜卜
既徒勞流光逝難掬

還過白水河

君不見匡廬瀑布天下奇銀河倒瀉長虹垂又不見廣陵
曲江濤八月橫捲冰山海門決竭來九十九隴間高峽飛
流坐飄忽轟雷掣電眾壑鳴噫氣怒號長林驚忽如神鬼
叫嘯雜沓凌雲行又如蹴踏空谷萬馬合一聲卽視長空
曳素練百幅千幅鵝溪絹天矢雨集下玉箭五月晴霄忽

飛霰噴沫跳珠溼兩岸白霧迷漫風不散此間儻可便乘
槎擬晤張騫話星漢

龍里道中

曙光棲禽覺初語驚幽悄山村夜無漏暗室窗失曉朝暾
逼寒巖宿霧半縈繚登登徑曲盤煙躡墮遐渺花樹綠全
暗露草青未了珠洞陰沈沈甕城波漾漾忽度馬桑沖脫
兔憶凶狡弋獲縱魚爛追躡已雲擾爲政良獨難平中勿
傷慄白馬此舊司赤子慎相保

曉發畢陽至新屯

豈洞猿窩別未遑尋雲西去獨迴翔羈禽飛盡巖花靜野
鹿銜餘澗草香十日人偏三度過千峯雨促一輿忙居民
錯認歸來客爭道天中好泛觴

張九鎰字權萬號橘洲湘潭人乾隆丁巳進士改庶吉
士授編修歷官四川川東道有退谷詩鈔

慈恩寺塔

見說繁華界憑欄劇可憐殘碑唐歲月荒草漢山川日落
邀雙鳥樓空卷片煙下方何處是燈火郭門前

涪州牛坡箒

曉雲如墨破山行未辨巉崖犖确橫射虎幾人逢李廣叱
羊何處問初平苔黏古木寒無色草伏陰蟲細有聲兩日
崎嶇頭欲白不關蕭瑟動秋情

帥家相字伯子號卓山奉新人乾隆丁巳進士歷官潯

州知府有三十乘書樓集

王柳村曰卓山氣格沈雄有幽燕氣與從父念祖時
有大小帥之目曾賓谷采其詩合陳伯璣王于一會

庭間蔣心餘汪葦雲楊子
載何鶴年爲江右八家

因視饑籍夜投山寺憩宿有述

翳翳翠微暮採蕨人未還我馬嘶忽驚虎跡空連山誰能
絕恐懼余亦趨禪關借問持筐人信往遭禍艱潛身度密
箐趨避力孔殫餒腹藉少充縱死辭羸辱偷生豺狼窟人
命輕豆箪念之迫中腸吏責何由寬老僧供薄粥揮退不
擬餐忍飢度深夕庶以齊痾瘵穴鼠號顧我餘糧亦奚干
惻怛吾同人不言心已酸四鄰寂雞犬闔室候夜闌明晨
忍遽出菜色吾重看

夜坐

淮海高秋夜風霜獨坐身有家從委婦疏節未安貧素月
寒相照孤蛩語共親百年縈守念宇宙最艱辛

花豹梁

漸入飛狐道經行花豹梁馬蹏愁細石人面拂濃霜江海
拋前夢并幽逐大荒莫添兒女恨牽率淚成行

彭遵泗字磬泉丹稜人乾隆丁巳進士改庶吉士歷官
涼州同知有丹溪遺藁

詩詒磬泉爲樂齋仲尹之弟與樂齋治詩古文之學
蜀中號二彭領乙卯鄉薦第一士論翕然撰蜀碧十
卷述張獻忠
亂蜀事甚詳

過應山楊大洪故宅

黑風吹獄氣陰陰何處招魂慰夙心解脫龍淵歸北寺毒
流狗監指東林大刀未試奸猶在棋局翻殘恨總沈每歎
晚來邦國瘁人亡何禁涕淋淋

沈雅字雲洲高郵人乾隆丁巳進士官海陽知縣有脫

粟集

登金山塔

孤塔在高巖來登最上頭鐘從天外落雲傍檻邊浮海氣
渾如雨江聲半是秋中流無障礙一望已全收

史震林字公度號梧岡金壇人乾隆丁巳進士官淮安
教授

偶成贈懶雲上人

避俗託僧舍有客求入分應之以草書濃淡如秋雲墨香
交酒香顛仙嗅而醺換鶴不換鵝騎訪芙蓉君

微雨過池來疏花開且落草堂無俗客共步有雙鶴耦耕
時或輟詩畫偶然作俯仰念疇昔恐負芝蘭託

蘇鶴成字語年號野汀交河人乾隆丁巳進士有野汀

詩藁

惜春

惜春芳序晚岑寂淡幽情補病休資藥非才敢近名雲歸
三徑暝花落一村晴望盡林泉外乘風社燕輕

去年與劉艾園汲泉共飲今年余客南皮渡河歸來
感而紀之

憶酌寒泉沁齒牙馬嘶高柳避塵沙無端一夜霏微雨開
徧沿村苜蓿花

翁文達字兼卿號桃湖古田人乾隆丁巳進士有桃湖
詩集

田父吟

農夫終歲未得閒十畝爲田一畝圃有婦饁餉并采蔬兒

嗚抱向田頭哺哺兒長代汝勞瞬息只如朝與暮

孫擴圖字充之號適齋濟甯人乾隆丙辰舉人丁巳乙丑兩中明通榜官錢塘知縣有一松齋集

七夕吟

癡人切切指牛女今宵難盡離別語離別經年暫相親今宵早斷明日魂我聞此語忽失笑此事有無誰知道卽將俗語爲爾明爾等爲我傾耳聽天上隔年如隔宿牛女幾會相向哭人世自多生別離還應向天問雙棲卽作一年纔一會牛女活得萬萬歲一年一會未爲多從古到今卻如何人世生年不滿百中間或作北邙客牛女高挂北邙前累累精魂哭向天人間我語皆失色我亦零零雙淚溢人謂孫郎眞解人精言妙論如有神自此不詠銀河句自

此不復乞巧去但將果餌供孫郎憑郎說破癡人腸

晚晴移詩匯卷七十四終